



Aqqalu C. Jerimiassen
Atassut

UKA 2021/146-147/1
20. oktober 2021

Inatsisartut aaliangiiffigisassaattut siunnersuut Naalakkersuisut peqquneqassasut Naalagaaffimmi oqartussaasunut saaffiginequllugit qulakkeerniarlugu, Kalaallit Nunaata killilersorneqanngitsumik Istanbulimi isumaqatigiisummut ilanngunnissaa. Tamanna pissaaq UPA2022 pisinnagu.

Inatsisartut aaliangiiffigisassaattut siunnersuut Naalakkersuisut peqquneqassasut aningaasanik immikkoortitsinissaannik persuttaanerup minnerunngitsumillu angerlarsimaffimmi persuttaanerup akiorniarnissaa ersarissumik anguniarlugu, inuiaqatigiinni 2025-mi persuttaanerit amerlassusaat ullumikkumut sanilliullugit 25 procentimik apparsimassasut. Paasisitsiniaaneq kingusinnerpaamik 1. august 2022 aallartinneqassaaq 31. december 2024-ip tungaanut ingerlanneqassalluni.

(Inatsisartunut ilaasortaq Anna Wangenheim, Demokraatit)

Ukioq 2011 maajip isikkarngani nunat 45-ut EU-lu tamarmiulluni ataatsimeersuarneq naammassivaat atsioqatigiillutik, inuit pisinnaatitaaffiisa qaffassaqqinneqarnerunissaat tunaartarlugu.

Nunali ingerlatsiviusimasooq ajoraluartumik ukioq manna marsip 20-iani tunuartertoq Tyrkiep præsidentiata Recep Tayyip Erdoğan-ip nalunaarutingaa.

Suliniut kusanaruttortoq sanngiiliartorluni aallarsimanera ajuusaarutissaavoq.

Tamannali aporfiginagu uagut inuiaqatigiittut akisussaaqataasutut iliuuseqartariaqarnitta siunnersuutigineqarnera Atassummiit nuannaarutigaarput tapersorsorlugulu.

Akuerineqanngisaannassaarmi inoqammut persuttaasarneq, inuk kinaagaluaruniluunniit inatsisitigut illersugaanini malugisinnaasuaannartariaqarpaa.

Aap, arnanut persuttaasarneq akuersaannngilluinnarparput tamatta, akuerinngisaannassallutigulu. Illuanilli maanna naligiisitaanerup eqquutsinneqarnissaanik nilliaatigineqarnerpaaffiani arnaq angullu assigiimmik inatsisitigut illersugaanissaat pisariaqarmat.

Timikkuuppat tarnikkuuppat, persuttaaneq inoqammut naleerusaaaneruvoq ajortuliornerullunilu annertoq.

Atassummiillu oqaaseq una atortuartagarput taalaassuara: Ilaqutariinneq sukarsuuvoq tamani pingaarnepaaq, ilaqutariillu ingerlalluartut tassaagajupput toqqissisimasumik avatangiiseqartuusut, meerai toqqissisimasut asanninnermik kialaarnemillu angajoqqaaminniik tuniorarneqartuutuusut. Meerarlugu toqqissisimasumik anaanamik ataamillu asaneqarluni peroriartortoq tassakkajummattaq



siunissami angusaqarluarnissaminik siunertaqartuusoq, minnerunngitsumillu imminut napatilersinnaallunittaaq siunissami inuulersussaq.

Qimarngueqarnermi arnat meeqqallu iluarsiivigineqarsimaneri qujarunnartaqaaq, naligiisitaanermullu oqaaseq piviusumik atorneqassappat, ajoraluartumik tamanna illuinnaasiortumittaaq aaqqiisimaneq nassuerutigineqarsinnaasariaqarpoq, imaanngitsoq angut nukittunerugami kisimi persuttaasoqarsimappat akisussaasuussasoq. Erseqqissarlarali putusaariuartut paatsoortuusaartartullu peqqunagit, angutit arnanut meeqqanullu persuttaasartut akuersaanngilluinnarpakka

Ullutsinni paqumigineqartoq nassuerutigisinnaasariaqalerparput: angutit aamma qimarngueqartariaqalerput! Ullutsinni ersinngitsumik anguterpassuaqarmattaaq tarnikkut timikkullu annertuumik ikilersorneqartunik, angutaassutsilli innarlarsinnaasutut kannguginera pillugu nassueruteqarnissaminut ajukkuttunik. Tamannalu ajoraluartumik ajornerpaatillugu imminut toqunermik allaat kinguneqarsinnaasarmat. Taamaattumik persuttaaneq pinaversaartinniarlugu oqimaaqatigiisumik siammasissumillu iliuuseqarta.

Paasisitsiniaanerit aallunneqartuartariaqarneri Atassummiit apeqqusersunngilluinnarparput tapersorsorlugulu.

Paasisitsiniaanerilli ingerlanneqarnerinissaaq inunnik maligassiuisunik atuisariaqarpugut, inunnik nuannaartorineqarsinnaasunik “rollemodeller” atuisinnaasariaqarpugut, pissusitoqqat paasisitsiniaanermi atorneqartartutoqqat kisiisa ukkatariunnaaalarlugit.

Meeraq inuusuttuararlunniit maligassamik isigisaqartilluni soorunalimi tiguartinnerusarportaaq, oqariartuutigineqartullu taamaalilluni isertilluarnerusinnaallugittaaq.

Taamatut oqaaseqarluta Atassummiit siunnersuut Ilaqutariinnermut peqqissutsimullu ataatsimiitsitaliamut innersuupparput.